

SANDRA CROES CU UN L.P. INTERNATIONAL

"QUE SE MUEVA" DI SONO - RODVEN VENEZUELA



E popular cantante y modelo Sandra Croes di 22 aña di edad, recientemente a ricibi for di e casa "disquero" Sono Rodven, cual ta un di e casa disquero mas renombra di Venezuela, su promer disco di larga duracion titula "QUE SE MUEVA". Ta trata di un L.P. sumamente profesional, ya cu ta aparece nombrenan famoso den produccion manera; arreglista y director musical; Manuel Tejada y compositor; Palmer Hernandez. Ambos di Republica Dominicana

, tambe compositor, arreglista y director musical; Luis Alva, kende ta un Peruano resindencia na Caracas Venezuela.

Den Ambiente por a comprende den e entrevista aki, cu ta un di e logronan mas grandi den su carrera artistico.

Tabata un lucha y un sacrificio duro pa e "bella" Sandra por a realisa e soño aki.

Su contract cu e compania disquero Sono Rodven ta encera varios viaje pa Venezuela pa promocion di e L.P., y tambe varios presen-

tacionan na Venevision den "Sabado Sensacional", cual ta e "show" mas sintonisa den full Latino America, Miami y Los Angeles.

E L.P. aki tambe lo wordo lansa na Colombia ariba Rodven -Discos y na Miami Florida ariba Th - Rodven.

Sandra a presenta su mes cantando na Tele Aruba pa prome vez na edad di apenas cinco aña, bow direccion di Sra. Roda Frigelio. Na 1978 el a "join" e coro di Tuti Fruti y na 1985 Young Voices bow direccion di Sra. Maybeline Arends Croes.

Tambe Sandra ta miembro di su parokia stima Sta Cruz, cual ta bow direccion di sr. Maiky Croes.

Na 1979 Sandra a bira ganadora absoluto di e festival Voz Infantil Aruba y Antillas organisa pa C.O.V.I.A.

Su prome 45 rpm a wordo graba na aña 1979 den Aruba Recording Studio, cu temanan di sr. Jossy Brokke jr., cu arreglos di sr. Amado Rosina. Na 1982 Sandra a graba otro disco bow direccion di sr. Casin Giel den Watapana Recording Studio. Durante temporada di carnaval Sandra a graba temanan di carnaval di entre otro Chicho Kock, Didi Wernet, Chucho Hoek, cu arreglos y direccion di Hildward Croes. Na aña 1986 Sandra a forma parti di e "rockband" Scantion bow direccion di Grace-Marry y Cederic Werleman.

Na 1987 el a forma parti di Berklee's Band bow direccion di Hildward Croes, pa un "rock concert" produci pa Romeo Thyssen. Durante di pasco ultimo a graba dos cancion bow direccion di Effi Thiel. E aña aki tambe Sandra a forma parti di e

"Aruba All Stars Band", pa e temporada di Aruba Jazz & Latin Music Festival.

Den exterior Sandra a presenta entre otro na Sto. Domingo den "Show de Medio Dia", y na dos ocasion na Miami Florida den "Sabado Gigante", transmiti pa e cadena Univision, y tambe den "Calle Ocho" riba "stage" di Aruba hunto cu e agrupacion "Musical Time". Na Hulanda den Groennoord Hallen na Leiden el a presenta cu "T.C. and The Plyboys", hunto cu Claudius Phillips y Robert Jeandor, pa e show di Arubadag.

Tabata 22 di December 1990 ora cu "Papito y su Doble Sabor" a wordo contrata door di famia Croes pa anima e celebracion di cumpleaños di Sandra, unda pa prome vez nan a companja Sandra cu un tema di su L.P. nobo como un simple sorpresa pa e invitadonan. For di akinan Sandra a wordo acerca pa Nelis Winklaar y Papito Rafael pa e posibilidadnan pa integra den "Papito y su Doble Sabor". Como ta trata di e banda favorito di Sandra e no a pensa mucho y a acepta e oferta mesora. Sandra a debuta cu "Doble Sabor" na Februari es aña aki cu e cancion di Ana Gabriel "Hasta Que Te Conoci", cual el a hanja un gran acogida di e pueblo di Aruba. Actualmente Papito y su Doble Sabor ta trahando duro ariba nan proximo L.P. cu muy pronto ta ariba plaza.

Nos a comprende cu ariba e L.P. aki Sandra lo presenta cu dos tema. Ya caba Sono-Rodven, a scucha parti di e L.P. nobo aki di "Doble Sabor", y tambe nan por a aprecia e video tapenan. E compania disquero aki a keda masha enthousiasma cu e

projecto aki y tambe cu nomber di e banda aki.

Nan ta inespera di finalisacion di e L.P. aki, pa por hiba combersacionnan cu Papito pa un posibel contract.

E banda ya caba ta preparando su proximo gira pa Europa, cual ta stipula pa April 1992.

Den pasado Sandra a gana tres premio "ORO ARUBA" y encuesta di e revista "Amistad", pero manera Sandra mes ta bisa cu su "biografia" a cuminsa ora cu el a inicia combersacionan cu e casa "disquera Sono-Rodven".

Durante bishita di Wilfrido Vargas na Aruba pa apertura di "Coastal", Wilfrido a goza di e tremendo presentacion di e banda "Papito y su Doble Sabor" di es manera aki el a acerca Sandra pa posibilidadnan pa integra den "Las Chicas Del Can". Pero esaki no tabata posibel pa Sandra, pasobra ya e tabata tin combersacionnan cu Sono-Rodven.

Pa e certamen di Miss Mundo, Sandra ta preparando fuertemente. E lo mester viaja pa Londres, Inglatera dia 27 di november proximo pa atende na e actividadnan di Miss Mundo, cu lo tuma lugar na Londres, Africa, New York y e eleccion final mes lo ta dia 28 di december na San Juan Puerto Rico. Sandra kier a probecha den e entrevista aki di gradici tur medionan di prensa cu semper a apoye, y tambe su tata Everaldo, su querida mama Sofia, su rumannan Edmond y Vito cual ta su manager, cu hunto nan a logra e bunita projecto aki. E proximo tema promocional for di su L.P. lo ta un "merengue" "CON TIGO TA BON" di e compositor Palmer Hernandez. DEN AMBIENTE ta desea Sandra Croes "DOBLE" exito, tanto pa su recien L.P. y tambe pa su compromiso pa Miss Mundo.